



UNIVERSITÄTS-
BIBLIOTHEK
PADERBORN

Universitätsbibliothek Paderborn

Methodus Clara Et Facilis Vacandi Orationi mentali Atque Exercendi se cum fructu in præsentia Dei

Coloniæ Agrippinæ, 1687

De oratione mixta

[urn:nbn:de:hbz:466:1-46004](https://nbn-resolving.org/urn:nbn:de:hbz:466:1-46004)

CAPUT XXV.

*De oratione mixta.**Definitio.*

Alterum orationis genus, de quo hocce tractatu acturos nos promissimus, est ea, quæ vocatur *oratio mixta*, quæ illa est, in qua considerationem internam intermiscemus verbis ore prolatis, considerando maturè, & quantum possumus, ea, quæ sub sensu eorundem verborum latitant, degustando.

Hoc orationis genus perquam facillimum est ac pauci laboris, ideoque Incipientibus accommodatissimum, qui nondum acquisierunt habitum consequenter materiam aliquam meditationis deducendi. Imò etiam Proiectiores ac Perfecti & consequenter omnes omninò homines eo uti possunt quovis tempore, loco & occasione, præcipuè ubi præparandi se ad orationem tempus defuit, vel ubi per infirmitatem profundiori rei cujuspiam considerationi non licet intendere.

Ubi igitur hoc genere orationis uti volueris, sequentia monita observabis.

1. Seliges aliquem Psalmum, versum aut aliam orationem vocalem, quæ sit affectiva, aut in quam singulari jam tum feraris devotione, ne fortè intentione tuâ frustreris, si capias argumentum, super quo tenequeas occupare, eo quod sterile sit in seipso, aut quod gustui tuo non arrideat.

2. Singula verba, aut singulos versus sigillatim & consequenter attentè considerabis;

matu.

maturèque, sedato ac tranquillo animo ac sensu, expendes, connitendo, ut inde affectu aliquo commovearis: Quod si verò verbum aliquod, sive versus conceptum nullum suppeditet, postquam in illo nonnihil hæseris, ad alia transibis, neque cum violentia conceptum aliquem elicere contendes, quia tempore orationis magnam oportet animo indulgere libertatem, atque una cogitatio sive conceptus bonus sponte velut suâ enatus utilior est omnibus illis, quos violenter quis elicere contendit.

3. Consectandi non sunt pulchriores conceptus, neque cogitationes curiosæ, sed magis insistendum conceptibus simplicibus, devotis, quique in præxin facile queant deduci. Quod si argumentum sit purè affectivum, affectivam quoque facies meditationem, colloquendo cum Domino nostro, ut suprâ exposuimus; sin verò, primò elicies aliquam considerationem, ac deinde produces affectus; argumentum verò purè affectivum appellamus, ubi verba ad Deum in secunda persona diriguntur, uti verbi gratia ista: *Domine, quis habitabit in tabernaculo tuo, aut quis requiescet in monte sancto tuo? Qui ingreditur sine macula &c.* Ubi verò in tertia persona collocantur verba, argumentum purè affectivum non est, ut in istis: *Quis ascendet in montem Domini, aut quis stabit in loco sancto ejus? Innocens manibus & mundo corde.*

4. Adhibendæ hic erunt eadem industriæ, quas suprâ annotavimus, ut considerationes nonnihil dilatentur, aliquando interpellando

R 4

Deum,

De
atione

Deum, alias interrogando Dominum nostrum Jesum Christum, quandoque etiam per apostrophem alloquendo animas nostras, atque alia hujusmodi faciendo.

§. Produces affectus, juxta quod illi in corde tuo enascentur, absque alio ordine præter illum, quem ipsa materia præbet. Illi autem proprii esse debent, atque ex ipsa deducti materia, non verò aliunde violenter atque artificiosè petiti. Denique præ cæteris fovendi sunt illi, qui animam ad virtutis ac mortificationis exercitationem impellunt, neque unquam omittenda aut oblivioni tradenda sunt bona proposita, quæ sunt quasi fructus orationis, semperque à Deo petenda est gratia illa executioni mandandi. Hac in re quivis statum suum ac necessitatem observabit. Orationis hujus faciendæ methodum amplius edocēbunt sequentes formulæ.

CAPUT XXVI.

*Formula orationis mixtæ continens
expositionem orationis Dominicæ
Pater noster.*

Directio.

Laudabo & orabo te, Domine, eadem, quam tu ipse me docuisti, oratione. Illam indubiè audies, atque aurem illi præbebis: quia nos illam non docuisti, nisi ut ipsam dicamus. Da mihi, obsecro, gratiam ea, quæ in illa continentur penetrandi, illiusque beneficio